

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"Te e'a mau o te feia pi'o ore ra, o te faarue ia i te parau ino; e o tei haapao i to'na ra e'a, ua faaora ia i to'na iho varua." Mas. 16: 17.

"O tei parau vave mai aità i faaitchia'tu, ua faaite oia e maamaa to'na, e au ia'na te vahavaha." Mas. 18: 13.

Nu. 5.

10 Febuare 1908.

Mat. 1.

Na te Feia i Rapae Au.

No te mea e rave rahi te mau ekalesia aita e au maitē te tahi i te tahi, te faahapa ra râ te tahi i te tahi, te mana'o nei te tahi mau taata e mea faufaa ore ia ia imi i te mea tia, e mea maitai râ ia parahi i rapae au i te mau ekalesia atoa e eiaha ia amui atu i roto i te hoê noa'tu, e eiaha hoi ia tauturu atu i roto i te ohipa e faatupuhia e te hoê noa'tu o te mau ekalesia. Ua tano anei te reira huru mana'o? A feruri rii tatou ia itea e mea au anei te reira huru mana'o i te taata paari, e aore anei:

Aita'tu te mea maitai rahi i roto i teie nei ao ia imi, maori râ te paari. Mas. 16:16. E mea hinaaro rahi te paari i te mau taata aan maitai atoa. E itea te pahono tia i te taata paari, e ore râ te reira vahi e roaa i te maamaa e te taata feruri ore. Ia feruri-maitai-hia te mau ekalesia e rave rahi, to ratou huru o roto e o rapae atoa, ta ratou mau parau tumu e to ratou auraa'tu i ta Iesu i haapii maira, teie

te tahi mau mea e itea i roto i te tahi pae o taua mau ekalesia ra, oia hoi te haavare, te parau tumu pê, te parau au ore i ta Iesu, te nounou moni, te parau maamaa, te hinaaro ia tapeahia te taata i roto i te pouri, etc. E no reira e mea maitai anei ia faarue taue atu i te mau ekalesia atoa? Eiaha. Te vai nei te ekalesia tia roa, e te viivii ore, e te maitai rahi, e te vai atoa nei te tahi mau mea maitai i roto i te mau ekalesia atoa. Aita roa te Atua i vaiiho i to te ao nei i roto i te pouri taotao i teie nei anotau. E itea ta'na ra ekalesia mau i te taata itoito i te hiaai i te maitai o tē imi papu ma te aau pure e te taupupu ore. Iak. 1: 5-7.

E mea maitai anei ia faaruehia te maitai e te ino atoa? Ia haere te taata i te matete e hoo i te maa, e itea i reira te mea maitai e te mea ino, ua hunahia te mea pê e te mea nainai faufaa ore i raro roa i te farii, ua hoohia te haari apî ei opaa e te haari mau ei nia, ua tuatihia te mea nainai i te mea rarahi ia hoo-apipiti-hia, e ua imihia te mau peu rii haavare atoa e vare ai te taata, e mana'o ai oia e mea maitai te mea ino. E nahea tatou ia mana'o i te hoê taata te haere i te matete e hoo i te maa, ia ite râ oia e te vai apipiti nei te ino e te maitai, e tia oia i te atea ê i te hi'o-noa-raa'tu, a na ô atu ai i roto i to'na iho aau, Ua haavare paatoa, e ore au e amu, e haapae noa vau i te maa, e ore roa vau e haapao noa'tu i te poia rahi o to'u nei opu. Aita anei e tia ia parauhia e taata maamaa oia? E, teie râ te mea tia, ia hi'o-poa maite oia i to nia e to raro atoa i te hoini e ia itea te mea maitai roa, ia hoo mai i te reira, a vaiiho atu ai i ta'na, e mea pê e te nainai faufaa ore tei raro roa i te hoini, ia imihia'tu â te taata e vare i te reira peu ino haavare ra. Oia atoa te taata e hi'o noa'tu i te mau ekalesia i roto i teie nei ao, e no te mea e rave rahi tei pê roa i te tumu, e na ô ai oia i roto i to'na ra aau, E ore au e farii e e amui atu i te hoê noa'tu o ratou ra, e haapae roa vau ia ratou atoa, e ore roa vau e haapao noa'tu i te poia rahi e te pouri taotao o to'u nei varua. Aita'toa anei e au ia parauhia e e taata

mana'o ore atoa oia? Hoê â ia to'na huru e to te taata e ore e amu i te maa no te mea ua haapaohia te mau peu rii haavare e te tahi pae o te feia hoo maa ra. Teie râ te mea tia, ia imi papu oia e ia hi'opoa hoi i te mau ekalesia atoa, e ia itea te ekalesia tia, e au maite i ta Iesu i haapii mai, aore i pê te mau parau tumu, a farii mai i te reira, a vaiiho atu ai i tei haapao i te mau peu rii haavare e te au ore ia imi atu â i te taata e vare ia ratou ra. Ei aau imi noa to te taata atoa e tia'i. Eiaha e haapao noa'tu i tei parau mai e, Eiaha e imi, oi vare outou. "E imi, e itea ia." Mat. 7: 7.

Ia hi'opoa râ te taata ia itea te hape, eiaha roa oia ia matapo i tei maitai. Eiaha roa ia riro ei taata imi pae-tahi noa. Ia imi râ ma te mata tia e te aau haehaa e tia'i i te farii mai i te mau mea maitatai atoa e te vaiiho noa'tu i te ino e te hape.

Na roto i te imi hua, te hi'opoa maite e te feruri papu ma te aau pure, e itea mai ai te parau mau, e vetea mai te ra'i, e heheuhia mai te parau popou rahi o te basileia hana-hana o te Atua, e e faaamuhia mai te taata i te maa e faa-poria mai ai i te varua taata e tae noa'tu i te ora mure ore ra. A haere mai e tamaa i te paeau varua ra.

TE KATIKITA.

U. Eaha te maitai rahi e roaa mai na roto i te inuraa ava?

P. Mana'o maamaa.

U. Eaha te maitai rahi e roaa mai na roto i te pupuhiraa i te avaava?

P. Feruriraa paruparu.

U. Eaha te maitai rahi e roaa mai na roto i te haavare?

P. Te roo ino.

U. Eaha te maitai rahi e roaa mai na roto i te eiâ?

P. Te rima tapea.

U. Eaha te maitai rahi e roaa mai na roto i te taiata?

P. Te tino paruparu.

Aita rea te taata i roto i teie nei ao o te ore e imi i te hoê e te piti noa'tu o teie nei mau mea maitai rahi!!! Tei-hea te mea ta oe e imi na? 1 Thes. 5: 22, 23.

Te Tao'a No te Ra'i.

“E ao to tei hiaai i te maitai; e faaîhia ratou.” Mat. 5:6. E faaîhia i te aha? E faaîhia i te mea i hiaaihia, oia hoi te maitai. Eaha te maitai e au i te taata atoa ia hiaai? Tera ia, te ite, te paari e te haapao maitai. Nafea te roaaraa mai? Na roto ia i te ohipa, oia hoi na roto i te haapiiraa e roaa'i te ite, na roto i te feruri hohonu e roaa'i te paari, e na roto hoi i te faatitiaifaroraa i to'na haerea e roaa'i to te taata nei haapao maitai; mai te taata hinaaro moni, na roto ia i to'na itoitio i te hoora ta'oa, e aore râ te faaapuraa fenua, e aore râ te hopuraa pârau, e aore râ te tahi atu â mau ravea e roaa mai ai ta'na. E toru ravea te vai nei e roaa mai ai te moni, oia hoi na roto i te ohipa maitai, na roto i te ohipa ino, e na roto i te eiâ. Eita râ e tia ia eiâ i te ite, te paari e te haapao maitai, e ore hoi e roaa mai na roto i te ohipa ino. Hoê noa iho e'a e tae atu ai i te ite, te paari e te haapao maitai, e mea piri e te titiaifaro hoi taua e'a ra; e e'a paiumaraa ia, e tahe noa'i te hou i nia i te ra'e i te haereraa. O te haapiiraa ia taua e'a ra. E maitai rahi râ to te ite, te paari e te haapao maitai i to te moni. Ia farerei te taata moni rahi ite ore i te taata ite, ua haama oia, no te mea aita ta'na mau pahonora e tano maitai; e e ore ta'na moni e riro ei hunaraa i to'na ite ore, maori râ i roto i te amuiraa o te feia mana'o ore. Ia horoa noa'tu te taata i te moni, ua pau ta'na; ia horoa noa'tu râ te taata ite i te ite, e rahi noa'tu â, aita roa ia i pau ta'na, eiaha hoê vahi iti noa'e; ia rahi tei horoahia'tu, ua rahi roa'tu â tei toe mai. O te huru mau ia no te mau mea e tia i te vai-raa. E tia ia horoa noa'tu i te ite e te paari, aita râ te pueraa i roto i te aa e haere i te itiraa, ua tupu râ i te rahiraa: E ia haapuai roa i te horoa noa'tu, ua puai atoa te pueraa i roto i te aa i te haere i te rahiraa. No reira Iesu i parau mai ai e, “Eiaha e haapue noa i te tao'a na outou i teie nei ao, i te vahi e pau ai i te hûhu e te pê, i te vahi e tomohia'i

e e eiâhia'i e te eiâ; e haapue râ i te tao'a na outou i nia i te ra'i i te vahi e ore e pau ai i te huhu e te pê, e ore hoi te eiâ e tomo i reira a eiâ ai." Mat. 6: 19, 20.

Te ite e te paari i haapuehia i roto i te aau, o te tao'a ia no te ra'i, no te mea e tia i te vairaa, e ore e tia i te eiâ ia haru. O tē faaamui mai â i te haapao maitai ra, e maitai hau ê atu â to'na.

TE AROHA.

E aroha'tu i to outou mau enemy; e faaora'tu i tei tuhi mai ia outou; e hamani maitai atu i te feia i riri mai ia outou;" Mat. 5: 43, 44.

Ua tae mai te parau i te hoê emepera Tinito tahito e ua orure to te hoê tufaa fenua rahi atea no'na i te hau. Na ô atura oia i ta'na mau raatira nuu tama'i, "A haere mai, a pee mai ia'u, e haapau roa tatou ia ratou." Ia fatata maira te emepera e to'na ra nuu rahi i te feia orure hau, ua vî roa to ratou mana'o etaeta, auraro maite ihora, aroha'tura te emepera ia ratou, e ho'i atura. Ua ui maira te raatira nuu tama'i rahi i te emepera ma te maere rahi, na ô maira, "Eaha oe e ore ai e faatia mai ai i ta oe parau e haapau roa'tu i to oe mau enemy? E teie nei, aita oe i tahoo atu, ua faaora râ oe ia ratou atoa e ua aroha roa'tu oe i te tahi pae." Pahono atura te emepera, na ô atura, "Ua oti roa ia; ua haapau-roa-hia tau mau enemy atoa e ua faatia-roa-hia ta'u nei parau. Na'u ratou atoa i faariro ei hoa au maite." Mas. 16:7. 15: 1.

Ua manuia rii te ohipa orometua e faaore i te hooraa i te mau huru ava atoa i roto i te fenua Amerika. Ua ite-papu-hia e pohe ino te hopea no te feia e inu i te ava, e no reira ua faaore-roa-hia e te ture fenua te hooraa i te ava i roto i na tufaa fenua rarahi ra e 7, e i roto i na mataeinaa ra e 750, e i roto hoi i na oire ra e 4,355. Aita roa i faatia-hia te taata ia hoo i te ava e te mau huru pape inu taero atoa i roto i taua mau vahi atoa ra.

Te Avaava.

Te na ô maira te taote rahi ra o Martin i te faaiteraa mai i te mau iino no te pupuhiraa i te avaava:

“Tera mai te tahi mau ohipa no te avaava ia hutihia to’na auauahi i roto i te tino, oia hoi te faaore ra ia i te tupuraa o te mau mea menemene uteute i roto i te toto, e ino ai te toto, e purare’a te mata, e e paruparu ai te tino taatoa; te haaparuparu ra i te opu e ore ai te maa e mārû maitai ai; te haapouri rii ra i te mata, te faahautiuti ra i te mafatu, a haaparuparu ai i taua melo ra; te faatupu ra i te teimaha o te mana’o, e ore ai te hinaaro e faaitoito i te tino i te raveraa i tera ohipa i tera ohipa, e riro ai ei tumu papu e ore ai e manuïa’i te mau ohipa e opuahia ia rave.”

Ua na ô atoa maira te taata tuiroo rahi faahoro pereoo auauahi ra i te fenua Amerika, o Harimana, “Hoê â ia huru te taata e pupuhi noa i te cigaret (avaava) e te taata maamaa; aita e oti maitai te ohipa e faaauhia ia’na.” Ua ahuru te tausansiraa o ta’na mau tavini rave ohipa, e ua taa maitai ia’na te tavini maitai e te tavini ino, e te tumu ua faufaa ore te tahi pae taata ei tavini rave ohipa. O te hinaaro ia riro ei taata maitai roa i te raveraa ohipa, ia faarue oia i te peu pupuhi avaava e tia’i.

Te faaite atoa mai nei M. Louis Drollett, taata hamani uati i Papeete, e ua haere atura oia i Tarafonia e haapii i te toroa hamani uati, e na haapii maira te fatu o te fare uati rahi ia’na ra e mai te mea e hinaaro to’na ia riro ei aravihi i roto i taua ohipa ra, ia faarue oia i te peu ino pupuhi avaava e tia’i, e ore ai te ruru rima, e aore râ e ore oia e riro ei taata ite numera hoê i te toroa hamani uati. No reira ua faarue oia i te avaava, e ua mauruuru roa oia e tae noa mai i teie nei mahana, i ora’i oia i taua suko rahi faataupupu ra, te pupuhiraa avaava.

Te vai nei i roto i te ao atoa nei e 62 milioni puaahoro-fenua, 195 milioni puaatoro, e 434 milioni mamoe.

Na Pomaret Orometua:

Ia ora na oe e ta'u hoa itoito e!

Tei mua ia'u nei te "Lamepa Api" no Novema 1907, e te ite faahou nei au i ta oe ihora tahitohitoraa i te hoê parau a te Atua, oia hoi te tuuraa rima, i haapaohia i roto i te ekalesia a Iesu Mesia i tahito ra, e i teie nei anotan atoa hoi, ei ravea no te horoa i te Varua Maitai i te feia i faaroo ra. I na ô mai hoi oe e, "Eiaha oe e faariro faahou atu â i to rima repo noa ei e'a no te Varua Maitai. Atira na i te tiaturi i to apu rima ei opere i te Varua Mana o te Atua e ta'na mau horoa i nia iho i te taata," etc.

Ia taiohia ta oe nei parau, aita'tu e mana'o e tupu, maori râ te tamata nei oe i te faaore i te tuuraa rima a faariro atu ai ei mea faufaa ore i te evanelia nei. Aita oe i taio e ua haamau te Mesia i te tuuraa rima ei parau tumu i roto i te mau parau matamua o te Mesia? Heb. 6: 1, 2. No te mea ua faaau te Mesia i te tuuraa rima ei ravea no te horoaraa i te Varua Maitai i tuu atu ai Petero raua o Ioane i to raua pue rima i nia iho i te feia faaroo i baptizohia i te pape e Philipa. Teie te parau te faaite i te reira:

"E tae atura raua i raro, ua pure ihora ia horoahia mai te Varua Maitai ia ratou ra. Aore â hoi Oia i tau mai i nia iho ia ratou atoa ra, o te baptizo ana'e ra to ratou i roto i te i'oa o te Fatu ra o Iesu. Ua tuu atura raua i to raua rima i nia iho ia ratou, noaa ihora te Varua Maitai ia ratou ra. E ia hi'o a'era Simona, ia tuuhia te rima o taua na aposetolo ra i nia iho, i horoahia mai ai te Varua Maitai ra, ua faaite maira oia ia raua i te moni, na ô maira, E ho mai atoa mai i tena na mana no'u, ia tuu vau i ta'u rima i nia iho i te taata ra, ia roaa te Varua Maitai ia'na." Ohi. 8: 14-19.

E na aposetolo ite ore e! Eaha orua i faariro ai i to orua pue "*rima repo noa ei e'a no te Varua Maitai?*" Teie te mea tia, a faaroo na orua i ta te Porosetani, "*e vaiiho*

noa'tu i te Varua Maitai i te farararaa mai ma te rima ore i te vahi ta'na i hinaaro ra?" No te aha orua i faafarara mai ai i taua Varua Maitai ra na roto i taua peu faufaa ore ta orua i rave ra? E o oe atoa hoi Paulo, na vai i haapii atu ia oe ia tuu to oe "*rima repo noa*" i nia iho i te taata, ia oe i bapetizo faahou i te tahi mau pîpî e ia oti atura, "Ua tuu atura Paulo i ta'na rima i nia iho ia ratou ra, e ua haere maira te Varua Maitai i nia iho ia ratou, e ua parau ihora ratou i te parau êê, e ua tohu ihora i te parau?" Ohi. 19: 5-7.

E te aposetolo no te etene e, aita anei oe i faaroo e, na faaore te haapaoraa Porosetani i te tuuraa rima no te horoaraa i te Varua Maitai i te feia faaroo? Aita anei oe i faaroo e ua faaaau faahou te mau haapaoraa Porosetani huru rau i te mau melo i roto i te tino o te Mesia ma te faarue atu i te mau aposetolo e te peropheta, te tohu, te faaora ma'i, te heheuraa apî, etc etc.? E ua tuu ratou i te orometua i roto i te ekalesia, o mua ia, te piti ra, e diakono ia, e ua haamanahia ratou e te mau taieti a te taata nei ei faaore i te tuuraa rima, taua parau tumu o te evanelia, ta outou e Petero ma i haapao ei ravea ia faafarara mai i te Varua Maitai o tei opere maite i ta'na i hinaaro ra no tera taata e no tera taata. 1 Kor. 12: 28. To oe ite i te evanelia e Paulo e, i heua mai ai e Iesu Mesia, e mea papu ore ia! Gal. 1: 11, 12. Ua paari roa'e paha te mau orometua Porosetani i te haapiiraa a te mau haapiiraa rarahi a te taata nei, no reira a ui tatou ia ratou e, e mea tia anei te tuuraa rima no te horoaraa i te Varua Maitai, e aita anei?

Ua farii Paulo i te Varua Maitai na roto i te tuuraa rima no Anania o tei tonohia e Iesu ia rave i te reira. Ohi. 9: 17. Na roto i te tuuraahia o te rima no Paulo i nia iho ia Timoteo ua noaa ia'na te Varua Maitai. 2 Tim. 1: 6. Ua farara mai te Varua Maitai i te raveraahia o taua peu tumu nei, e ua horoa mai i te tohu, e te parau êê e rahi atu â, ei faaite i te faufaa e te tia no taua ohipa ra i ravehia e

taua tavini mau o te Atua ra. Te roaaraa o taua mau tapao o te Varua Maitai ua riro ia ei faaiteraa e na te Atua taua ohipa ra. Te oreraa hoi o taua mau tapao no te Varua Maitai i roto i te mau faaroo huru rau e vai i te fenua nei, ua riro ei faaiteraa e, na te taata ana'e ratou. Mai te mea e hanere noa'tu te tuuraa rima o te hoê taata aore i maitihia e te Atua e i haamanahia e ana, eita roa te Varua e farara mai e hoê iti a'e, e au râ te reira huru i tei ravehia e na tamaiti toohitu a Sekeva. Ua tamata ratou, ma te haamana-ore-hia, i te tiavaru i te varua ino i rapae i te hoê taata, ua parau atura râ taua varua ino ra, "Ua ite au ia Iesu, ua ite hoi au ia Paulo, o vai râ outou na?" Ohi. 19: 14-19.

Te ui maira oe e, ua noaa anei i taua feia matahiapo ra, oia hoi te mau aposetolo e te mau pîpî, te Varua Maitai i te Mahana Penesekote na roto i te tuuraa rima? E, i taua ravea noa iho i noaa'i ia ratou te Varua Maitai ra. Na te Fatu ihora i tuu te rima i nia iho ia ratou. Teie te faaiteraa: "E inaha, na'u i tono mai ia outou nei ta ta'u Metua i parau maira, e parahi râ outou i te oire nei i Ieruselema, e ia noaa mai to outou itoito no nia mai. E ua aratai atura oia ia ratou i rapae au i Betania, ua hopoi a'era i ta'na rima i nia, faaora maira ia ratou." Luk. 24: 49, 50.

Te ui faahou maira oe e, ua noaa anei i te ati Iuda e 3000 i baptizohia i te mahana Penesekote te Varua Maitai na roto i te tuuraa rima? Teie te pahouora e au: E, ua na reira-mau-hia. Ua amuihia i reira e 120 pîpî i te vahi hoê. Ohi. 1: 15. 2: 1. No taua tairururaa hoi te tino ahuru ma piti aposetolo e rahi atu â te mau tavini hitu ahuru ta Iesu i maiti na. Luk. 10: 1. E oti noa te tuuraa rima i nia i taua pîpî ati Iuda e 3000 i te hoê pae iti o taua mau pîpî 120 ra. Teie te mau tapao te faaita mai e ua roaa ia ratou te tuuraa rima: Hoê.— E mea tia ia ravehia te tuuraa rima i nia ia ratou, no te mea e ture tumu te reira no te evanelia a te Mesia. Te piti ra.— Mai tei faaitahia i te tahi mau vahi i nia'e ua haapao noa Petero ma i taua oroa ra no te

horoaraa i te Varua Maitai. Te toru ra.— Ua haapii atu e ua haapao maite te mau aposetolo i ta te Mesia i haapii maira. Heb. 2: 3. E no reira, papu roa'tura te mana'o e ua tuu-mau-hia te rima o te feia toroa i nia iho i taua feia faaroo e 3000 ra. Aita te parau i faaite mai e ua tuuhia te rima ia ratou i taua mahana ra, aita roa hoi i faaitehia mai e aita te rima i tuuhia i nia iho ia ratou. Teie to oe hape i iteahia ra, oia hoi te faariroraa i te vahi tei faaite ore-hia ra ei tiaraa no to oe faaroo, a faarue taue ai i te hoê parau tumu o te evanelia ta Petero ma e Paulo ma i haapao noa a'e. No te mea ua haapoto Luka, o tei papai i te Ohipa, i te parau no te mau mea i ravehia i taua mahana ra, i mana'o hape ai oe e, aita mau i tuuhia te rima i nia iho ia ratou.

Te vai ra te tumu papu i horoa oioi noa mai te Atua i te Varua Maitai i nia iho ia Korenelio ma, oia hoi ei faaite-raa papu e ua haapao te Atua i ta'na evanelia no te etene atoa ra, eiaha no te ati Iuda ana'e ra. Na te Atua taua ravea ra ei haapii mai i taua mea hoê roa. Aita roa taua farii-raa hoê o te Varua ra i faaore i te tuuraa rima tei haamau-hia ei parau tumu i roto i te evanelia, e tei haapaohia e te mau aposetolo i ta ratou faafanauraa i te feia faaroo mau i te Varua, ia ô ratou i roto i te Ekalesia a Iesu Mesia.

E hoa e, e iteahia te orometua haavare i ta'na haapii-raa. Mat. 7: 21. Ua tapao ta oe haapii-raa ia oe ei orometua o tei haapii i te parau au ore roa i te parau a te Atua. E mea mure ore te mau parau tumu o te evanelia. E no reira, atira na ta oe haapouriraa i te taata.—PUTERA.

Te rurutaina nei te taata aau paruparu ia farerei oia i te mana'o taata, e te faateoteo nei te taata maamaa, area te taata paari ra, te hi'opoa maite nei oia i te reira.—Parau a LA ROCHEFOCOULD, taata Farani paari.

Ia teoteo te taata no to'na ite rahi, e tapao ia no te maûa hau ê roa'tu.—TAYLOR, EPISEKOPO.

Tuatiraa.

“E te parau mau.” Ua haere mai Iesu i teie nei ao ei parau mau. Ua rave i te mau tapao hapa ore e rave rahi ma te faahiti pinepine mai i te parau ra e, Amene, Amene,” oia hoi e parau mau, e parau mau, ma te faaite hua mai e, e Tamaiti Oia na te Atua, e ua fa’i i te fa’iraa parau mau i mua i te aro o Pilato, e ua itea te mau mea maerehia i te mahana i pohe ai Oia. E i to’na ho’iraa i nia i te ra’i, ua hi’o te mau pipi ia’na i te revaraa’tu, ei faaite papu-raa e, e parau mau roa ta’na, aore roa oia i haavare. Ua û anei teie nei mau parau i nia i te parau tumu, o tei na ô maira e, “O vau te e’a, e te parau mau?” P. A feruri i te irava i muri nei: “Riro mai nei te Logo ei taata, e ua tiahapa mai i ô tatou.” U. Eaha te Logo? P. E re’o Helene te Logo, e parau te auraa. No reira e parau mau ta’na i parau maira e, o Oia te parau mau.—TOAE.

TE POIA OPU.

E rave rahi te mau taata i roto i teie nei ao tei rave i te ohipa e roaa’i te moni a haapau roa’tu ai i te reira i nia i te opu e ta’na mau hiaai atoa. Ua tano anei te reira huru haapaoraa, e aore râ te vai nei anei te haapaoraa e hau i te maitai? Pahonoraa: Te vai nei te haapaoraa e hau e roa’tu te maitai. Tera ia: Ia tuu te taata atoa i te tahi pae o ta ratou moni i nia i te mau ravea maitatai atoa e faatupuhia i rotopu i te taata nei ei faaaraararaa mana’o maitai, mai te buka parau maitai, te haapiiraa huru rau, te vea, te piano, e tera mea maitai e tera mea maitai. O tei faaamu maitai i to’na ra tino, ua roaa te etaeta, e oti te ohipa rahi ia’na; o tei haapue râ i te ite e te paari i roto i te aau, e pihaaraa oaoa to’na o te tia i te vairaa e a muri noa’tu. Mas. 24: 5.

Te Mau Parau Api.

O Farani te fenua i faaapu-maitai-roa-hia i Europa.

5,269,200 pute sitona i ootihia i te fenua ra o Autaralia i te m. 1907.

E 2, 754 re'ô êê i parauhia e te taata i roto i teie nei ao.

Ua neneihia te vea matamua i roto i te oire Venice i Italia.

E 20 milioni puaa maohi i taparahihia ei maa i roto i te fenua Amerika i te matahiti hoê.

E o'e rahi tei na tufaa fenua ra o Agra, Oudh, e o Delhi i te fenua ra o Inidia i te avae Tenuare nei.

Ua tupu te ma'i pohe i te oire ra o Brisbane i te fenua Autaralia, e ua pohe roa te hoê taata i te 9 no Tenuare nei.

I te 13 no Tenuare ua tae atura te mau manuâ Amerika i te oire taperaa pahi ra o Rio Janeiro i te fenua Amerika Apatoa i to ratou tereraa i Tarafonia. E 53 te taatoaraa o te mau pahi.

Ua tarahuhia e ono pahi auauahi i te oire Niu Yoka e te hoê sotaieti i Amerika e afai atu i te mau machine faaapu huru rau i te mau fenua Europa. E 25 milioni dara e roaa mai ia oti te hooraa.

No te peapea moni i roto i te matahiti 1907 ua mairi te pene no te mau tufaa i roto i te mau sotaieti rarahi Beritane e 387 huru rau i raro roa. Tera te rahi o te moni i faarue, 1710 milioni dara.

140,000 taata i tapeahia i roto i te mau fare auri i te fenua Rusia i teie nei. E fenua haavî taata Rusia, e ua taupûpu i te haapiiraa. Ia ore te tamarîi ia tae i roto i te haapiiraa, ia paari oia ua tae i roto i te fare auri.

Te rahi o te moni i fariihia mai e te Hau Amerika i hau i tei pau i te faatereraa i te hau i roto i te m. 1907, e \$84,000,000.00 ia e toe mai i roto i te afata moni. E tapao ia no te manuîa rahi o te mau ohipa no te hui raatira, e te tano maitai o te ohipa no te mau faatere hau.

No te mea aita te mau taata Iapone i faatiahia ia tapae i te mau fenua re'ô Beritane te haere nei ratou e rave rahi i te fenua Brazil, Amerika Apatoa, e parahi ai. Ua apîapî roa te fenua Iapone i te taata, no reira te imi haere nei ratou i te mau fenua e faufaahia ratou i te parahiraa.

Ua aueue faahou te fenua i te oire Kingston, Amerika Apatoa, i te 3 no Tenuare nei; 15 setone te maoro o te aueueraa. Ua mairi te fare pure-raa Porosetani Episekopo i raro. I te 15 no Tenuare 1907 e pau rahi to taua oire ra i te aueue fenua e te auahi, e ua hanere te taata i pohe roa.

Toae a Maire, Faaau Parau,
Rue Dumont d'Urville, Orovini, Papeete, Tahiti.
Frank Cutler, Imprimeur,
Rue Bréa et de la rue Dumont d'Urville, Papeete, Tahiti.